

Här Mars di Bartolomeo

President vun der Deputéiertechamber

19, um Krautmaart

L-1728 Lëtzebuerg

Lëtzebuerg, den 7. Oktober 2016

Här President,

Sou wéi d'Chambersreglement et virgesäit, bieden ech lech, dës parlamentaresch Fro un den Här Unterrechtsminister weiderzeleeden.

Den 20. Oktober organiséiert déi „Gréng Stéftung“ eng „Diskussiounsrönn“ iwwer d'Méisproochegkeet, déi schonn am Titel als „Chance fir eis Kanner“ bezeechent gëtt. Moderéiert gëtt déi Rönn duerch e gréngen Deputéierten an et schwätzt den Här Unterrechtsminister. E Verrieder vun enger Oppositionspartei, déi där geplangter, méisproocheger Kannererzéiung géing kritesch géintiwwerstoen, ass net invitéiert. Dozou wollt ech dem Här Unterrechtsminister dës Froe stellen:

1. Wisou gëtt eng Diskussiounsrönn, déi vun der „Grénger Stéftung“ organiséiert gëtt a politesch net equilibréiert besat ass, vum IFEN als offiziell Fortbildung unerkannt?
2. Ass den Här Unterrechtsminister der Meenung, datt esou eng Praxis enger demokratescher Kultur entsprécht an dat si déi politesch Neutralitéit vun der Schoul respektéiert?
3. Wa jo, wéi erkläert den Här Unterrechtsminister, datt keng Oppositionspolitiker, déi seng Iddien net ënnerstëtzen, kënnen zu Wuert kommen?
4. Ass den Här Minister net där Meenung, datt déi offiziell Unerkennung vu senge Rieden an Diskussiounsbäitrag als „Fortbildung“ fir d'Léierpersonal eng Form vun Amtsmëssbrauch ass?
5. Wéi dacks ass et scho virkomm, datt Manifestatiounen, déi vu politesche Stéftungen oder politesche Parteien organiséiert goufen, als offiziell Fortbildung unerkannt goufen? Kann den Här Minister déi detailléiert opzielen (vum IFEN an och aus der Zäit vum Oktober 2013 un, wou et den IFEN nach net gouf)?
6. Wat wëll den Här Unterrechtsminister maache fir eesäiteg politesch Propaganda aus eise Schoulen eraus ze halen?

Mat déiwem Respekt,



Fernand Kartheiser  
Deputéierten



Lëtzebuerg, den 14. November 2016

Affaires générales

Monsieur le Président de la Chambre des  
Députés  
19, rue du Marché-aux-Herbes  
L-1728 Luxembourg

**Réponse du Ministre de l'Éducation nationale, de l'Enfance et de la Jeunesse à la  
question parlementaire N° 2454 du Député Fernand Kartheiser**

**Ad 1, 2, 3, 4, 6)**

Den IFEN hält pro Joer eng ganz Rei Veranstaltungen als Formation continue a seng Offer op, di a Cooperatioun mat Institutionen, Syndikater oder Associatiounen organiséiert ginn. Viraussetzung heifir ass, datt dës Veranstaltungen et den Enseignanten erlaben, sech inhaltlech mat Problematiken auserneen ze setzen, déi sech hinnen an hirem Berufsfeld stellen, an zu hirer Professionaliséierung bäidroen. Dozou gehéiert ouni Fro den Émgang mat der Méisproochegkeet an eise Schoulen.

Zu der Veranstaltung déi den honorablen Députéierten uschwätzt, wëll ech richteg stellen, datt de Minister just eng allgemeng Einleitung gemaach huet. Den Haaptriedner war en onofhängegen Expert vun der Universiteit Lëtzebuerg, an den Diskussiounspanel huet aus Experten vu ministerielle Servicer wéi dem Centre de Logopédie an dem SECAM éngersäits, an Experten aus dem Secteur vun der Kannerbetreung anersäits bestanen.

D'Qualitéit vun den Diskussiounen, déi och kontrovers gefouert goufen, hunn d'Unerkennung als Formation continue dofir och absolut gerechtfertegt. Doriwweir eraus wëll ech betounen, datt ech den Enseignanten duerchhaus zoutrauen, déi Positiounen déi am Kader vun Formations continues ausgedréckt ginn, kritesch ze beliichten a sech en eegent Bild dozou ze maachen.

**Ad 5)**

Folgend Veranstaltungen, di vun ënnerschidlechen Institutionen oder Associatiounen organiséiert goufen, a bei deene Regierungsmemberen intervenéiert sinn, goufen an d'Offer vu Formation continue vum IFEN opgeholl:

09.10.2014: Auf dem Wege zu einer integrierten Mehrsprachigkeit und plurikulturellen Identität - Vers une éducation plurilingue et pluriculturelle

17.02.2016: COP21 – Klima-Accord'en vu Paräis – Wéi eng Erausforderunge bis 2050 ?

17.10.2016: 3. internationale Männerkonferenz in Luxemburg (icmeo).

Claude Meisch  
Minister fir Educatioun, Kanner a Jugend